

**2018-miit ukiuni marluugallartuni misiliilluni unnukkut ammasartussamik (nal. 16-24) nuna tamakkerlugu call-centerimik, Nuna tamakkerlugu Ilitsersuisarfik (NTI-p) ataani pilersitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Call-Centeri sukkasuumik kinaassutsimillu isertuussilluni ilinniartunut, ilinniarnikkut, aningaasatigut inuttulluunniit ajornartorsiuteqartunut ikorfartuissaaq siunnersuisarlunilu. Call-centerip aamma taamatut siunnersuisarsinnaassaaq ilinniartut ilaqutaannut.**  
(Inatsisartunut ilaasortaq Nivi Olsen, Demokraatit)

### **pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISUTAA**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqaatigiit, Siulittaasoq  
Inatsisartunut ilaasortaq Vivian Motzfeldt, Siumut, Siulittaasup tullia  
Inatsisartunut ilaasortaq Laura Táunâjik, Siumut  
Inatsisartunut ilaasortaq Peter Olsen, Inuit Ataqaatigiit  
Inatsisartunut ilaasortaq Henrik Fleischer, Partii Naleraq

Ulloq 15. maj 2017-imi UPA2017-p nalaani siullermeerinninnerup kingorna ataatsimiititaliap  
siunnersuut misissorpaa.

#### **1. Siunnersuutip imarisaa siunertaalu**

Siunnersuutikkut kissaatigineqarpoq Center for National Vejledningip (nuna tamakkerlugu ilissitsersuisarfiup (NTI) ataani nuna tamakkerlugu siunnersuisarfimmik pilersitsinissamut Naalakkersuisut peqquneqassasut. Pilersitsineq ukiut marluk misiliutitut ingerlanneqartussatut kissaatigineqarpoq. Siunnersuisarfik unnukkut nal. 16.00-miit 24.00-mut ammasassaaq, ilinniartunut ilaqutaasunullu ilinniagaqarnerup, aningaasaqarnerup inuttulluunniit ajornartorsiuteqarnerup tungaatigut sukkasuumik kinaassutsimik isertuussilluni siunnersuisinnaassalluni. Siunnersuummi siunertaavoq - neqeroorutit pioreersut saniatigut – pisortanit ingerlanneqartumik iliniartunut ilaqutaasunullu assigiinngitsunik peqquteqarlutik kinaassutsiminnik isertuussillutik persuarsuutaanngikkaluartumik siunnersorneqartarnissaat.

## 2. Siunnersuutip Inatsisartuni siullermeerneqarnera

Siunnersuut siullermeerneqarnermini ilaatigut tapersersorneqarpoq.

Aakuunerulersitsinissamut ajornartorsiuteqarneq, nunatsinni siunnersortit sulisussarsiarineqartarneranik ajornartorsiuteqarneq kiisalu sullissinermut inatsit tunngavigalugu killilersuisinnaaneq tunngavigalugit siunnersuut Naalackersuisut tapersersunngilaat. Inatsisartuni amerlanerussuteqartut kissaatigaat siunnersuutip ataatsimiititaliamut ingerlatinneqarnissaa, kisaatigineqarluni ataatsimiititaliami itinerusumik eqqartorneqarnissaa.

## 3. Siunnersuutip ataatsimiititaliamit suliarineqarnera

Maannaanaq ilinniarunnaartarnermik annikillisaataasinnaasunut, ilinniartunik amerlanerusunik tigusinissanut ilinniarnermilu ikaarsaariarnermi aporfusinnaasunut assiginngitsunut millisaataasinnaasunut inatsisartut sinneri isumaqatigalugit suliniutinut ataatsimiititaliaq tunngaviatigut isumaqataavoq.

Aallaqqaasiullugu ataatsimiititaliamit erseqqissarneqassaaq siunnersuutip taasissutissartaani pineqarmat siunnersuisarfik (call-center) siunnersuutillu tunngavilersuutaani pineqarlutik oqarasuaatikkut nittartakkakkullu ilitsersuineq. Ataatsimiititaliali siunnersuutip ataatsimut suliarineqarnissaanut paasissutissiinerlunneq taama annikitsigisoq akornutigiumanngilaa.

Kalaallit Nunaanni ilinniartitaanermut inuussutissarsiutinillu siunnersuisarneq pillugu Namminersorlutik Oqartussat inatsisaat nr. 4, 29. november 2013-meersut tunngavigalugit aalajangersarneqarsimavoq. Inatsimmi pineqartumi § 1-mi imatut allassimasoqarpoq:

*§ 1. Kikkulluunniit ilinniarnissaq inuussutissarsiummillu ingerlataqalernissaq siunertaralugu akeqanngitsumik pitsaassusilimmillu ilitsersorneqarsinnaapput.*

Ilaatigut NTI-p suliai tunngavigalugit ataatsimiititaliamit pissutsit makku ima oqaaseqarfigineqassapput.

Misiliineq kissaatigineqartoq qanoq nalilersorneqarumava? Kinaassutimik isertuussisinaanermut tunngatillugu apeqqut immikkut isiginiarneqassaaq. Call-centerip suliaasa pitsaassusaat sunniutaallu pillugit nalunaarsuinerinnarmi tamanna nalerassatut atorneqarsinnaanngilaq. Paarlattuanilli peqqissaartumik nalunaarsuineq naammassinnittarnermi procentinik il.il paasissutissanik pissarsissutaasinnaavoq. Tamatuma kinaassutsimik isertuussilluni saaffiginnessinnaaneq ajornarsisissavaa.

Kinaassutsimik isertuussilluni saaffiginnessinnaanermit tunngatillugu Naalackersuisut akissuteqaataanni una takuneqarsinnaavoq:

*”Maluginiarneqassaaq Ilinniartunut Siunnersuisarfik pisortaniit suliffiutaammat, taamaammallu sullissinermi inatsisip ataaniilluni. Tamanna isumaqarpoq nalunaarsorneqanngitsumik oqaloqateqarnerit marluk kisimik pisinnaasut. Taakku sinneraanni suliamik aallartitsisoqassaaq nalunaarsuinerlu aallartinneqarluni.”*

Kinaassutsimik isertuussilluni siunnersorneqarsinnaanermut tunngatillugu pissutsit pingaarutillit Naalakkersuisunit erseqqissaatigineqarsorinarput. Siunnersuutip aappassaanneerneqarneranut atatillugu pissutsinut tamakkununga inatsisitigut tunngavissat erseqqinnerusumik Naalakkersuisunit nassuiarneqarnissaat ataatsimiititaliamit qinnutigineqassaaq, Naalakkersuisummi akissuteqaataanni tamakku naammaginatumik taaneqarsimasorinanngimmata.

Saaffiginnissut anguniakkanit saaffiginnissutaanersoq qanoq ilillugu NTI-mit uppersararneqarsinnaava? Kinaassutsimimmi isertuussinissaq kissaatigineqarmat NTI-mit nalilerneqarsinnaassanngilaq saaffiginnittoq ilinniagaqartuunersoq imaluunniit qanigisaanersoq. Sulinermi tamanna ima isumaqassaaq, inuiaqatigiinni kikkulluunniit saaffiginnissinnaanerat. Oqaaseq “qanigisaasoq” siunnersuummi killilerneqarsimanngimmat pisumi tassani ilinniartunut attuumassuteqartorpassuit peqataatinneqarsinnaapput. Inuttaasoq qanigisaasutut ilinniartoq pillugu saaffiginnippat, ilinniagaqartup ilinniagaqarneranut, aningaasaqarneranut inuttulluunniit ajornartorsiuteqarneranut tunngassuteqartumik unammilligassat pillugit ikiorsiinissaq siunertaralugu, qanigisaasutut saaffiginnittoq ataatsimiititaliamit naatsorsuutigineqarpoq. Taamaalilluni ilinniartoq sinnerlugu ajornartorsiutit qanigisaasup toqqaannartumik iluarsisinnaanngilai. Paarlattuanilli inuttaasup pineqartup ilaqtutani taamaallaat siunnersorsinnaavaa, ilitsersorsinnaavaa kiisalu kaammattorlugu. (Taamaattorli angajoqqaat/angajoqqaatut oqartussaassusillit meeqqap inuunerani pissutsinut assigiinngitsunut meeraq 18-liisimanngippat sunniisinnaapput). Tamatumunnga atatillugu kinaassutsimik isertuussilluni ilaqtariitut siunnersuisarfimmut Naalakkersuisut innersuussinerat ataatsimiititaliamit pissusissamisoorsorineqarpoq.

Aalajangersakkami qulaani pineqartumi takuneqarsinnaavoq, NTI-p maannakkut suliassa qarfiini pineqartut ilinniagassanik inuussutissarsiuutissanillu toqqaanermi siunnersuisarneq. Call-centerip pineqartup NTI-p suliassa qarfiinik inuttut aningaasatigullu ajornartorsiutilinnut aamma atuuttunngorlugu annertusaanerusussatut siunnersuuteqartumit kissaatigineqarpoq. Taamaalilluni ersernerluppoq inuttaasut suut saaffiginnissutigisinnaannginneraat. Peqatigisaanillu siunnersuineramik suliaqartussanut piginnaasaqarnissamik annertuumik piumasaaqateqartoqarpoq. Ullumikkut NTI-ip peqqissutsimut inuttullu ajornartorsiutit pillugit siunnersuisinnaanani pisortatigoortumik nalunaarutigisimagaa ataatsimiititaliamit paasineqarpoq<sup>1</sup>. Siunnersuuteqartulli siunnersuutigaa, inuit isumaginninnermut peqqissutsillu tungaatigut ilinniarsimasut

<sup>1</sup> <http://www.vejledning.gl/socpsy-raadg/hvad-kan-vi-goere-for-dig.aspx?lang=da>

siunnersuineq ingerlattassagaat. Inuttaasulli siunnersuummi pineqartutut suulluunniit pillugit siunnersorneqartassappata, inuit assigiinngitsumik ilinniarsimasut amerlanerusut, tassa, inunnik isumaginninnermut, aningaasaqarnerup tungaatigut, ilinniagaqarnerup tungaatigut inuussutissarsiornermullu pissutsinik ilinniarsimasuunissat pisariaqartussaq ataatsimiititaliamit nalilerneqarpoq.

Naalakkersuisut akissuteqaataat tunngavigalugu qarasaasiakkut attaveqaatitigut aaqqiissutaasinnaasut atorneqarsinnaasut misissorlugit aallartinneqareersimapput. Nutaaliaanerusunik isumassarsiornerullunilu siunnersueriaatsip NTI-ip sullissineranut pioreersumut ilanngutsinniarnearqarluni atorneqarnissaa siunnersuuteqartumit kissaatigineqarnera ataatsimiititaliamit pitsaasutut isigineqarpoq. Taamaalillugu ataatsimiititaliamit neriuutigineqarpoq sulinermut tamatumunnga isummersuutaasinnaasutut siunnersuut una isigineqarsinnaasoq.

Suliniuteqarnissaq kissaatigineqartillugu, pingaaruteqarpoq, siunnersuutip suliasaartaanuinnaangitsoq aammali akuliutsinneqarsinnaasut ilanngullugit naalakkersuinikkut sulinermi eqqarsaatigineqartarnissaat. Tamatumuuna ataatsimiititaliamit ajuusaarutigalugu maluginiarneqarpoq NTI-mi sulissarsiornermi annertuumik ajornartorsiuteqarnera Naalakkersuisut tikkuaraat. Qulaani pineqartumi qanorluunniit teknikikkut ajornartorsiutinik iluarsaassisoqartigigaluarpat, sulissussat siunnersuummut atatillugu pisariaqartinneqartusat ullumikkutut pissarsiariniarnerisa ajornakusoorsinnaanerata ataatsimiititaliamit maluginiarneqarpoq. Ajuusaarnartorujussuuvoq ullumikkut inuiaqatigiinni siunnersortariaqarneq ima annertutigimmat allaat matussuserneqarsinnaanani. Tamatumunnga atatillugu eqqarsaatigineqarsinnaavoq, siunnersuisarnermik sulinerup pitsanngorsarneqarnissaanut kiisalu NTI-mi saaffiginnittut akissuteqarnissamik utaqqisarnerisa sivikillisarneqarnera ilanngullugu eqqarsaatigineqartariaqartut siunnersuinissamut suliasavut annertuut eqqarsaatigalugit sulissussarsiornermut tunngavissat siamasinnerusut atorneqartalernissaat eqqarsaatigalugu.

#### **4. Siunnersuutip aningaasatigut kingunerisassai**

Inatsisartut suleriaasaanni § 33 imm. 1-imi takuneqarsinnaavoq, aalajangiussassatut siunnersuutip allaffissornermi aningaasatigullu kingunerisassai siunnersuutip tunngavilersuutaani nassuiaatigineqassasoq.


Siunnersuutip piviusunnigortinneqarnerani aningaasatigut kingunissartinneqartut siunnersuummi pissusissaq malillugu suliarineqarsimmata ataatsimiititaliamit maluginiarneqarpoq, tassa siunnersuut akuerineqarpat ukioq 2018-mi 2019-imilu katillugit 3 mio. kr.-it missaani aningaasartuutaasussat naatsorsuutigineqartoq. Nalilersuineq tamanna NTI-mi akissarsianut aningaasartuutit inatsisartut inatsisaanni konto pingarneq 40.90.13-mi allassimasut tunngavigalugit nalilersuineruvoq. Ataatsimiititaliamit eqqumaffigeqquneqassaaq

ullukkut nal. 8.00-imiit 16.00-imut sulinermit unnukkut sulisoqarnera akissarsianut aningaasartuutaanerusussaammat, Naalackersuisut aningaasatigut nalilersuinnermut isornarsinnaasunik uparuaatissaqannginnerat ataatsimiititaliamit paasineqarpoq. Tamannalu tunngavigalugu aamma ataatsimiititaliaq allanik oqaaseqaatissaqanngilaq.

#### **5. Ataatsimiititaliap inassuteqaataa**

Ataatsimiititaliap **isumaqatigiittup** siunnersuut **itigartinneqassasoq** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Mimi Karlsen  
Siulittaasoq



Vivian Motzfeldt  
Siulittaasup tullia



Laura Táunâjik



Peter Olsen



Henrik Fleischer